



# Ұлысыма құт ажал, Ұлу жылы!

Комиссия құрамы сайланды  
2-бет



Игілігі орасан орталық  
6-бет



Арқа мәдениетінің айшығы  
8-бет



ҚАЗДАУЫСТЫ ҚАЗЫБЕК БИ: СӨЗДІҢ АТАСЫ – БІРЛІК, АНАСЫ – ШЫНДЫҚ

# ORTALYQ QAZAQSTAN

1931 жылдың 4 қазанынан бастап шығады

Қ А Р А Ф А Н Д Ы О Б Л Ы С Т Ы Қ Қ О Ф А М Д Ы Қ - С А Я С И Г А З Е Т І

www.ortalyq.kz | www.instagram.com/ortalyq.kz/

СЕНБІ, 30 ЖЕЛТОҚСАН, 2023 ЖЫЛ №146 (23 322)

www.facebook.com/ortalyq.kz/ | info@ortalyq.kz

## Құрметті Қарағанды облысының тұрғындары!

Сіздерді келе жатқан 2024 жылмен шын жүректен құттықтаймыз! Бұл отбасылық мерекені біз отбасымызбен, жақын адамдарымыздың ортасында қарсы аламыз. Осы күні біз өткен жылды қорытындылап, болашаққа жоспар құрамыз.

Өтіп бара жатқан жыл оқиғаларға толы болды. Биыл біз аймағымызды тұрақты дамытуды жалғастыра отырып, өндіріс саласына инвестиция тартып, құрылыс қарқынын арттырып, денсаулық сақтау және білім беру нысандарының көптеп салынуын қамтамасыз еттік. Айта кету керек, біздің облыстың жетістіктерінде өздеріне жүктелген міндеттерді жауапкершілікпен орындап, кәсібилік танытқан әр тұрғынның еңбегі бар.

Біз алдағы 2024 жылы да алға қойған мақсаттарды орындай отырып, еліміздің гүлденуі жолында қажетті жұмыстардың барлығын атқаратын боламыз.

**Құрметті жерлерестер!**

Алда келе жатқан Жаңа жыл мерекесімен сіздерді құттықтай отырып, дендеріңізге саулық, отбасыларыңызға амандық тілейміз. Еліміз нығайып, гүлдене берсін! Жаңа 2024 жыл әр үйге бақ-береке, өркендеу алып келсін.

Жаңа жылдарыңызбен!

**Ермағамбет БӨЛЕКПАЕВ,**  
Қарағанды облысының әкімі  
**Нүркен КОБЖАНОВ,**  
Қарағанды облыстық мәслихатының төрағасы

• ЭКОНОМИКА

## ӘДІЛЕТТІ ҚАЗАҚСТАННЫҢ БАҒЫТ-БАҒДАРЫ



ЖОЛДАУ  
1 қыркүйекте Президент Қасым-Жомарт Тоқаев

**«ӘДІЛЕТТІ ҚАЗАҚСТАННЫҢ ЭКОНОМИКАЛЫҚ БАҒДАРЫ»**  
атты Қазақстан халқына Жолдауын жариялады.

Жолдауда жаңа экономикалық саясаттың негізгі бағыттары айқындалып, мынадай маңызды міндеттер қойылды:

- Экономикамыздың тұрақты өсімін 6-7 пайызға жеткізу;
- 2029 жылға қарай ұлттық экономиканың көлемін 2 есе ұлғайту, яғни 450 миллиард долларға жеткізу;
- Еліміздің байлығын, табысын азаматтарымыздың арасында әділ бөлу.

Еліміздің өңірлеріне сапары  
Биыл Мемлекет басшысы еліміздің 14 өңіріне жұмыс сапарымен барып, аймақтардың әлеуметтік-экономикалық әлеуетімен танысты.



Президент Жылдың 17 күнін өңірлерді аралауға арнады.

## Жаңа дәуірдің жарқын қадамы

Ерканат КЕЦЕСБЕКҰЛЫ,  
«Ortalyq Qazaqstan»

Тынымсыз өзгеріп отыратын әлемдік экономикалық ландшафт жағдайында өндірісті өңір «төрт аяғын тең басқан» орнықты қалпымен болашаққа жорығын сенімді жалғастыруда. Соңғы онжылдықта тұтас ел өзінің экономикалық стратегиясын қайта ойластырып, сын-тегеуріндерді қабылдап, жаңа мүмкіндіктерге ден қойды. Өңір экономикасы ұзақ мерзімді әріптестікке ұмтылған инвесторлар үшін тартымды үлгі. Баламалы энергетика саласындағы жобалар, технологиялық инновациялар және инфрақұрылымды дамыту әлемдік бизнестің назарын аударады. Банк жүйесіндегі қаржылық реформалар елдің инвестициялық серіктес ретіндегі сенімділігін көрсетеді. Нақтылайық.

▶ 3-бет

• 2024: ӘЙГІЛІ КОМПОЗИТОРДЫҢ ТУҒАНЫНА – 100 ЖЫЛ

## Сыдық Мұхамеджанов. «Шаттық Отаны» (Реквием)

**Серік АҚСУҢҚАРУЛЫ**

«Киік» станциясынан өткен сайын қазақтың даңқты композиторы Сыдық Мұхамеджанов осы жерден Алматыға арман арқапал кеткен шығар деген ойға шомам. Оның кіндік кесіп, кір жуған жері қазақтағы ғажайып та, қасиетті топырақтың бірі хәм бірегейі десе болады. Үш мың жылдық көшпелілер мәдениетінің толғағы жетіп, тоғысқан жері бұл. Сарыарканың уызына жарыған Сәкең күні кешегі Төттімбет, Тоқа, Дайрабай, Қыздарбек, Сембек, Итаяқ, Аққыз, Мақаш, Әбді, Әбікен, Бегісал дәстүріндегі шертпе күйдің қазанында қайнап, қаймағына кенелген біртуар тұлға еді. Оның «Шаттық Отаны» поэмасында сол терең де, ерен тылсым сикыр алыстан айқулақтанып, құлаққа шалынады.

Жерлесіміз, қазақтың ұлы композиторы Сыдық Мұхамеджанов өзінің осы туындысын «музыкалық поэма» деп атаған екен. Шын мәнінде, бұл бір дәуір, бір заманның марапат жыры! Қазтуғанның «Марапат жырындай!» Патетикалық поэма.

Қазір ел екі аяғы салбырап, көктем осы жерге түсе салғандай күй кешіп отыр, адам баласы туасы – ұмытшақ; осы отыз жыл ішінде баяғыда көрген-білгенін есінен шығарып алған... Мұны ісі қазақ баяғыда «Қой үстіне бозторғай жұмыртқалаған заман» деген. Ол бір кездегі біздің Асанқайғы, сонау Томас Морлардың қиял-ғажайыбынан туған қоғам еді. Бар-жоғы жетпіс жыл салтанат құрды да, тарихтың архивіне жөнеді! Еуропаны кезіп жүрген коммунизм елесі XX ғасырда салтанатты шеруін томамдады да, келмеске кетті! Соны музыка тілімен өрнектеп, өлмес өнер туындысына айналдырған біздің жерлесіміз, қазақтың саусақпен санарлықтай ұлы композиторының бірі – Сыдық Мұхамеджанов! Социализм туралы поэманы қайта тыңдаған сайын адамды мың сан ойға салып, жан-дүниені сарғайған сартап сағынышқа кенелтіп, арқаны шымырлататын музыкалық дүние бізден басқа бірде-бір елде жоқ десе де болады! Бізде ғана, қазақта ғана бар!

Замандар да, адамдар да көше береді, мәңгі бақи өлмейтін, жасампаз адам баласымен барлық қоғамдық-



экономикалық формацияларда өмір сүре беретін өнер туындылары ғана! Гомерлер кетті! Адамзаттың жадында «Илиада» мен «Одиссейлер» қалды! Сыдық Мұхамеджановтың «Шаттық Отаны» да осылардан аумайтын адамзат өнеріндегі шақпар (шедевр) шығармалар қатарында тұр!

Біздің балалық, жастық шағымыз, ат жалын тартып мінген кезіміз де осы қоғамда өткен. Біз оның орны ойсыраған кемшіліктері мен трагедиясына қарамастан егіліп сүйіп, оған ет-бауырымыз елжіреп қызмет еткенбіз; одан артық қоғамдық жүйе бар деген ой бізде болмаған! Адам өз заманының жемісі; соның әрі мықты, әрі осал қасиеттері біздің бойымызда әлі бар.

Қара жерден бауырын көтеріп, саналы адамға (лат. Homo sapiens) айналған адам баласының дүниеге келгеніне 300 000 жылдай уақыт болып қалған екен. Сол Homo sapiens-тің қалың бір тобы XX ғасырда қаны бұзылып, Homo Sovieticus-ке (лат.) айналды!

1917 жылы адамзаттың артта қалған бір бөлігі Ресейде Қазан төңкерісін жасап, Homo sapiens-тен бөлініп шығып, Homo Sovieticus (лат.) дейтін ұлыс құрды, ол XX ғасырдың 90-шы жылдарына дейін жалғалып ірі держава (СССР) атанып, өркениетті дүниенің зәре-құтын алып еді! Біз соның тірі қалған соңғы тұяқтары боламыз!

Бұл екі адамзат өкілінің (Homo sapiens – Homo Sovieticus) арасы – жер мен көктей! Болмыс-бітім, тіршілік-қарекеті мен дүниеге деген көзқарастары да бір-бірінен мүлде, керемет, алшақ! Әлихан Бөкейханов пен Мұхтар Әуезовтер Homo sapiens болса, Бейімбеттің Мырқымбайымен бірге гүмбір кешкен біздің бәріміз де Homo Sovieticus ұлысынан боламыз! Сыдық Мұхамеджановтың «Шаттық Отаны» осы Homo Sovieticus (Хома Советикүс) – советтік Қазақстан туралы жыр еді. Бұл поэмада біздің 70 жылғы гүмбірміздің галереясы шынайы бейнеленген. Оны тыңдаған сайын біздің жүрегімізді асқақ сезім, ел мен жерге деген шалқар махаббат кернейді! Мұны мына жарық дүниеге бізден кейін келген буын түсінбеуі мүмкін, бірақ, бұл сезімдер бізге етене жақын хәм оттай ыстық!

Евгений Брусиловскийдің Қазақстанға келуі ұлттық музыкамызды еуропалық деңгейге көтеріп, жасартып, жанартып, жаңғыртып тастап еді, оның Сыдық Мұхамеджанов бастаған шәкірттері бұрын-соңды болмаған биікке көтеріп, берісі республикалық, әрісі одақтық масштабта оған соны өрнек, ұлттық баяулар қосып, тыңға түрен салды!

## Жыл сүйіншісі Жиырма миллионбыз!

Қоян жылы қазақ еліне қуаныш әкелді. Президент сүйіншілеген ақжолтай хабар халық санының 20 миллионға жетуі – жылдың жағымды жанаулықтарының көші бастады.

**Аяулым СОВЕТ,**  
«Ortalyq Qazaqstan»

– Халқымыздың саны 20 миллионға жетті! Баршанызды ақжолтай жаңалықпен құттықтаймын! Бақытты отбасы – бақуатты елдің негізі. Мемлекет отбасы құндылықтарын нығайтуға, ана мен баланы қорғауға баса мән береді, – деп жазды Қасым-Жомарт Тоқаев Twitter-дегі парақшасына.

Сарапшылардың айтуынша, тәуелсіздік алғаннан бері демографиялық ахуал жақсарып келеді. Жан басы көбейсе, экономика да өседі. Кейінгі уақытта дүниеге келген балалар саны шамамен 15 пайызға өссе, орташа есеппен жыл сайын 400 мың бала дүниеге келеді.

Келер жылдан «Ұлттық қордан – балаларға» жобасы басталып, еліміздегі әрбір баланың есепшотына ақша аударылады. Қолдаулар елдегі демографияның жылдам өсуіне оң әсерін тигізеді деген пікірде көпшілік.



▶ 4-бет







• ЖЫЛ ТАРТУЫ

# 2023: баянды бастамалар

Ертең – 2023 жылдың соңғы күні. Жыл соңында оны қорытындылау дәстүрі бар бізде. Қоян жылы еліміз үшін өзгерістерге толы жыл болды. Мемлекет басшысының бастамасымен саяси-экономикалық реформалар жүзеге асырылып жатыр. Оның алғашқы нәтижелері де жоқ емес. Кез келген мемлекет үшін әлеуметтік саланың дамуы – маңызды зор мәселе. Жаңа мектептердің, ауруханалардың, мәдени және басқа да қоғамдық нысандардың ашылуы халықтың әл-ауқатын арттыруға бағытталды. Қоғамдағы оң өзгерістерді статистикалық деректерден, даму бағдарламалардың орындалысынан немесе қолдау шараларының осымен байқауға болады. Ал, аймақта биыл ашылған әлеуметтік-экономикалық нысандар тарих қойнауына енгелі тұрған жылды айшықтай түседі.



## Бірегей балалар ауруханасы

Облыстық балалар клиникалық ауруханасы Оңтүстік-Шығыс аудандағы жаңа ғимаратқа көшті. Бұл – шынымен де, көптен күткен нысан, жағымды жаңалық. Аймақ дәрігерлері заманауи аппараттарда ең күрделі деген операцияларды да осында жасайтын болады.

Күйік шалғандарға арналған инновациялық кереуеттер нәлдік гравитация мен нәлдік ауырлық әсерін жасайды. Төсек толтырғышының тығыздығын судың салыстыруға болады. Соның әсерінен науқас «жүзіп» жүргендей сезімде

болады. Бұл зақымдалған теріге қысым түсірмеуге көмектеседі. Микросфералар арқылы өтетін ауа автоматты түрде қажетті температураға дейін қыздырады және бактериялардың көбеюіне жол бермей, терінің жазылуы әсер етеді.

Ауруханада консультативтік орталық жұмыс істейді. Бар бөлімшелермен қатар, үш жаңа бөлім болады – травматология және ортопедия, нейрохирургия, жақ-бет.

Бұрын бұл бағыттар бойынша пациенттерді емдеу үшін Ана мен бала орталығы, Травматология және ортопедия

институты, Мақажанов атындағы клиникада немесе Астананың нейрохирургия ғылыми орталығына жіберілетін. Енді, мамандарымызды оқытып, осы салаларды өзімізде дайындаймыз. Жабдықтар жоғары технологиялық, операциялық бөлмелер автономды желдетумен жабдықталған, оларда НЕРА сүзгілері орнатылған.

Медициналық мекеме базасында емдік-дене шынықтыруға арналған заманауи кабинеттері, тұз, сенсорлық және шунгитті бөлмелер бар.

Осы уақытқа дейін балалар ауруханасы болған ғимарат медицина қызметкерлеріне арналған көпқабатты тұрғын үй ретінде қайта құрылады. Жас мамандарға арналған 94 пәтер жабдықталмақ.



Қазіргі таңда Қарағанды облысында «Жайлы мектеп» ұлттық жобасы бойынша 12 500 орындық 18 мектеп салынбақ. Биыл 10 мектептің құрылысы басталды. Атап айтқанда, Қарағандыда 4 мектеп, Балқаш қаласында –1, Бұқар жырау ауданында – 3, Шет ауданында – 2.

2024 жылға жоспарланған қосымша 8 мектептің (Қарағанды қаласында – 4 мектеп, Приозерск қаласында – 1 мектеп және Абай, Нұра, Қарқаралы аудандары-1) құрылыс жұмыстары толық аяқталғаннан кейін, барлық жайлы мектептер жергілікті атқарушы органдардың балансына берілмек.



## Аудандарда жаңа ФАП

Биылғы «Ауылдық денсаулық сақтауды жаңғырту» ұлттық жобасы шалғай ауыл тұрғындарына жаңа мүмкіндік берді. Енді дәрігерлер мен науқастар ескі, тар жерде емес, кең, жаңа, жабдықталған орында болады. Денсаулығы сыр берсе, аудан орталығына, қалаға бармай-ақ, өздерінде қарала алады.

Жоба аясында екі жылда 92 медициналық нысан салынады. Оның 14-і биыл бой көтерді. Шет ауданының Жұмыскер, Төменгі Қайрақты, Көктіңкөлі, Бұрма, Киікті, Босаға ауылдарының, Ақшатау кентінің тұрғындары жаңа нысанда ем алатын болды. Ақтоғай ауданының Ақжарық ауылында, Бұқар жырау ауданына қарасты Ақтобе, Новоузенка, Қарақұдық ауылдарында да фельдшерлік-акушерлік пункт ашылды. Сонымен қатар, Қарқаралы ауданының Ақжол, Татан, Томар ауылдарында да медициналық нысанның құрылысы аяқталды.

Облыстың денсаулық сақтау басқармасы берген мөлдетке сәйкес, барлық нысанның құрылысы аяқталған. Қазіргі уақытта ішкі жұмыстары жасалып, құрал-жабдықтар жеткізілуде.

Бұдан бөлек, Абай, Нұра, Бұқар жырау және Осакаров аудандарында алты фельдшерлік-акушерлік пункт ашылды. Олар «Ауыл – ел бесігі» бағдарламасымен салынды.



## Республикадағы тұңғыш

Отбасына көмек көрсетудің бірыңғай орталығында әйелдер полиция учаскесі ашылды. Жоба биылғы қазан айында қолға алынды және өмірлік қиын жағдайға тап болған әйелдерді қолдауға арналған.

Тұрмыстық зорлық-зомбылықпен күресудің жаңа әдістерін енгізу кезінде халықаралық тәжірибе ескерілді. Әйелдер полиция бөлімшесінің құрамына тергеуші, ювеналды және көші-қон полициясының инспекторлары, есірткі қылмысына қарсы күрес жөніндегі жедел уәкіл, пробация қызметінің өкілі және басқалары кіреді. Бір ерекшелігі – қызметкерлердің барлығы әйелдер. Осылайша, қарым-қатынасты мүмкіндігінше сенімді етуге тырыспақ.

Орталық барлық қажетті заттармен жабдықталған. Қызметкерлер жедел апаратын қол жеткізуі үшін құқық қорғау органдарының ведомстволық

базаларына қосылған. Әлеуметтік блокта инклюзия, қорғаншылық және қамқоршылық мамандары жұмыс істейді. Келушілер психологтың көмегін ала алады. Тіпті, қаржылық кеңесші бар, ол отбасылық бюджетті дұрыс бөлу туралы және интернет-алаяқтардың айла-амалдарына қалай түспеу керектігін айтады.

Орталық азаматтық қоғамның, жергілікті атқарушы органдар мен полицияның үздіксіз өзара іс-қимылының көпіріне айналуы тиіс. Түпкі мақсат – отбасылық-тұрмыстық қатынастар саласындағы құқық бұзушылықтарды азайту.

## «Өзім» өзге үшін

Қарағандыда ғана емес, Қазақстанда алғаш рет мүмкіндігі шектеулі балаларға арналған бірегей жоба қолға алынды. Оның ерекшелігі қаржыландыру жауапкершілігін әдеттегідей ата-ана емес, мемлекет көтеретіндігінде. Мұнда бала күні бойы болып, тиісті көмегін алса, ата-ана жұмыс істеуге мүмкіндік алады.

Яғни, пилоттық жобаға қатысып отырған орталыққа келетін әр бала жан басына шаққандағы қаржыландыру жүйесіне енеді. Бұл – ата-аналарға үлкен қолдау. Сабактар жеке және шағын топтарда өтеді. Балалармен логопед-дефектологтар, нейропсихолог, арт-терапевт және музыкалық терапевт жұмыс істейді. Олардың қозғалуына көмектесетін тьюторлар бар. Балалар үш рет тамақтанады. Үйлерінен алып кетіп, қайта апарып тастайды.

Мемлекет басшысының тапсырмасына сәйкес әлеуметтік қызметтер жүйесін модернизациялау қолға алынған. Еңбек және халықты әлеуметтік қорғау министрлігі Әлеуметтік қызметтер департаменті директорының орынбасары Гаухар Қалмақованың айтуынша, пилоттық жоба Қарағандыдан өзге жеті аймақта іске асады.



Бетті әзірлеген Жансая ОМАРБЕК

Суреттерді түсірген Жангелді ӘБДІҒАЛЫМ

## Үр жаңа студенттер үйі

Қаланың орталығында болашақ дәрігерлер үшін жаңа студенттер үйі ашылды. Тоғыз қабатты ғимарат екі жыл ішінде салынды.



Мұндағының бәрі заманауи: интерьердегі жоғары технологиялық стиль, толық тұрмыстық жағдайлар, мультимедиялық жабдықтары бар оқу бөлмелер, спорт және музыка залдары және басқалары білім алушылардың жайлылығы үшін жасалған.

Жаңа жатақхана 400 студентті қабылдай алады. Барлық бөлмелер екі орынды, толық жиһаздалған, әрқайсысында душ және жуынатын бөлме қарастырылған. Сонымен қатар, әр қабатта ас үй және тұрмыстық бөлмелер, киім-кешек бөлмелері, демалыс орындары бар.

Жергілікті билік жатақхана салуға қала орталығынан жер бөлді. Студенттер үйі көлік байланысы және әлеуметтік инфрақұрылымға қолжетімді жерде орналасқан. Құрылыс қаржы орталығының қолдауымен арнайы бағдарлама бойынша жоғары оқу орнының қаражатына жүргізілді.





